

李文忠公奏稿

李文忠公奏稿

卷之六十三目錄

綏鞏軍報銷摺

光緒十四年七月二十七日
附清單

開濬漳河片

光緒十四年七月二十七日

請停機器鑄錢摺

光緒十四年八月二十日
附清單

開濬澳工製造船隻片

光緒十四年八月二十日

學堂洋員請獎片

光緒十四年八月二十日

海防用款立案摺

光緒十四年八月二十日
附清單

和龍峪經費片

光緒十四年九月十三日

德員請獎片

光緒十四年九月十三日
附清單

浙鼎新請祀昭忠祠摺

光緒十四年九月十三日

海防練軍報銷摺

光緒十四年九月十三日

請病假片 光緒十四年十月十四日

再保桂木誠片 光緒十四年十月十六日

再請病假片 光緒十四年十一月初五日

中法接綫摺 光緒十四年十一月十二日
附章程

海軍俸餉悉照新章摺 光緒十四年十一月十二日

東海關欠解京餉片 光緒十四年十一月十二日

附省隄河工費片 光緒十四年十一月十二日
附清單

淮軍報銷摺 光緒十四年十一月二十七日

軍需交涉洋務片 光緒十四年十一月二十七日

造船添鍋鑪工費片 光緒十四年十一月二十七日

置買帆船片 光緒十四年十一月二十七日

力疾銷假摺 光緒十四年十二月初十日

海防用款立案摺

光緒十四年十二月初十日

附清單

三鐵艦支用銀數片

光緒十四年十二月初十日

洋教習請獎片

光緒十四年十二月初十日

調劑河災引片摺

光緒十四年十二月十三日

旅順興辦船塢片

光緒十四年十二月十九日

機器局報銷摺

光緒十四年十二月十九日

李文忠公奏稿卷六十三

全集一之六十三

桐城吳汝綸編錄

綏鞏軍報銷摺

光緒十四年七月二十七日

奏爲綏鞏軍自光緒十二年十二月起截至十四年六月底止收支餉項列爲第一案造冊請銷恭摺仰祈

聖鑒事竊前會辦北洋事宜吳大澂升任廣東巡撫所部綏鞏軍奏明歸臣接管嗣將該軍由樂亭一帶調紮山東威海衛創辦海防建築礮臺營壘因收支款目繁重派直隸候補道張紹華督同委員妥慎經理查綏鞏軍餉項前經吳大澂奏定每年在吉林防餉並東防餉內撥銀四十四萬兩按季赴部請領旋因該軍調防威海衛又經海軍衙門奏明照舊開支復以興辦礮臺工費無出酌量裁減營哨以所節月餉挹注工用亦經臣奏明在案茲據張

紹華詳稱自光緒十二年十二月初一日吳大澂移交臣接管起至十四年六月底止共二十箇月計原接餉銀二萬四千二百七十六兩零機器製造經費銀一百七十二兩零領過部庫六季餉銀六十六萬兩機器製造經費銀一萬兩礮隊改步變賣馬價銀一千五百三十兩共收銀六十九萬五千九百七十八兩零共放正雜各款銀七十七萬五千五百二兩零以收抵放計不敷銀七萬九千五百二十三兩零係吳大澂原購外洋軍火價腳等項先向洋商設法挪付未能久假不歸遂在江浙海關歲撥威海衛大連灣購礮經費專款內暫行借墊仍由綏鞏軍以後節出餉內除動支臺工經費外陸續勻提還借以清款目至放過銀兩內有威海衛礮臺經費銀四萬七千七百二十九兩零應俟該處臺工辦竣再行報銷先行照數登除計此次實請銷銀七十二萬七千七

百七十二兩零內應歸戶部核銷銀五十四萬三千三百八十六兩零兵部核銷銀六萬四千四百七十九兩零工部核銷銀十一萬九千九百七兩零至機器製造一款先經吳大澂奏准每年於吉林機器局經費項下分撥銀二萬兩以爲隨營製造局之用分春秋兩季赴部請領上年因吉林請添用款將此項分撥銀兩自秋季起仍撥歸吉林當因原設隨營製造局無款可支而該軍調防威海衛離津已遠所用新式鎗礮必須在營隨時修整並裝子藥不得不酌留委員工匠庶利器不致廢壞轉誤操防每月所需薪工等銀一百二十一兩及以後應添購物料均於該軍節省餉內勻支不另請款分晰造冊詳請奏咨前來臣覆加查核所支各款均照定例章程及報部案據撙節動放實用實銷並無絲毫浮冒除十二年十一月底以前用款業由吳大澂奏銷外所有十二

年十二月臣接管起截至十四年六月底止用款列爲第一案已造冊分咨戶兵工三部相應開具簡明清單敬呈

御覽仰懇

敕下各部核銷此後仍按年接續造報理合恭摺具陳伏乞

皇太后

皇上聖鑒訓示謹

奏

謹將綬鞞印自光緒十二年十二月初一日起至十四年六月底止收支餉項列爲第一案造冊請銷籍具簡明清單恭呈

御覽

舊管

一原接吳大澂移交防餉庫平銀二萬四千二百七十六兩六分八釐八毫一絲六忽

又移交機器製造經費庫平銀一百七十二兩五錢九分二釐三毫六忽

共存庫平銀二萬四千四百四十八兩六錢六分一釐一毫二絲二忽

新收

一收十三年春季至十四年夏季由部領回六季餉項庫平銀六

十六萬兩

一收十三年春季由部領回機器製造經費庫平銀一萬兩

一收礮隊改步變賣馬匹價值庫平銀一千五百三十兩

共收庫平銀六十七萬一千五百三十兩

管收兩項共庫平銀六十九萬五千九百七十八兩六錢六分一釐一毫二絲二忽內撥付威海衛礮臺工程局購辦工料銀四萬七千七百二十九兩三錢一分應俟工竣截數由北洋海防營工案內彙銷先行照數登除實計本案收用庫平銀六十四萬八千二百四十九兩三錢五分一釐一毫二絲二忽

開除

一發綏鞏八營馬隊水雷各一哨二十箇月餉銀四十七萬三千八百一十一兩五錢

一發各局委員二十箇月薪水湘平折合庫平銀八千九百四十四兩九錢二分六釐六毫四絲

一發裁撤兩營五哨未裁以前月餉並遣餉銀五萬五千五百六十四兩九錢

一發裁撤文武員弁書識勇夫未裁以前薪工湘平折合庫平銀一千六百四十九兩四錢二分一釐

一發製造局委員工匠薪工湘平折合庫平銀三千四百十九兩二錢四分二釐

以上應歸戶部核銷庫平銀五十四萬三千三百八十六兩三錢八分九釐六毫四絲

錢

一發綏鞏八營兩哨搬運長夫口糧銀三萬八千四百七十兩四

一發換補倒馬價銀八百四十六兩

一發軍火運腳各項銀一萬六千九百二十五兩五分七釐七毫

七絲八忽

一發飛運小輪船薪工銀二千六百三十八兩八錢三分三釐

一發裁撤飛兒小輪船未裁以前薪工並遣餉銀一千六十七兩

錢九分七釐

一發裁撤兩營五哨未裁以前搬運長夫口糧並遣餉銀四千五

百三十二兩

以上應歸兵部核銷庫平銀六萬四千四百七十九兩四錢

八分七釐七毫七絲八忽

一發綬帶各軍十二年秋季十三年春秋二季十四年春季更換
帳棚銀三萬七千七百二十四兩七錢八分

一發水雷營更換號衣靴巾銀二千一百四十七兩九錢六分七

釐三絲七忽

一發購買外洋軍火銀六萬五千八百二十九兩三錢五分

一發軍火收存上海棧租銀二千四百六十二兩

一發飛電輪船煤油銀六百六十八兩一錢三分八釐

一發請領部餉釘鐵木箱銀一千三百二十兩

一發製造局購辦康邦汽機鍋爐刺床等件銀一萬七百三十四

兩八錢

一發請領製造經費釘鐵木箱銀二十兩

以上應歸工部核銷庫平銀十一萬九千九百七兩三分五

釐三絲七忽

全單統共應銷庫平銀七十二萬七千七百七十二兩九錢一分二釐四毫五絲五忽

實在

除收不敷開支銀七萬九千五百二十三兩五錢六分一釐三毫三絲三忽門在江浙兩海關歲撥威海衛大連灣購礮經費專款內借墊仍由綏鞏軍以後節出餉內陸續勻提還借以清款目理合登明

開濬漳河片

光緒十四年七月二十七日

再大名府城外舊有漳河上接河南內黃縣經郡城西北入衛河
嗣因北道淤塞改由城南行走近年此路亦淤漳水本甚迅猛每
遇汛漲泛濫爲患上年於郡城西南大康莊決口漫流四溢城內
外多被浸灌報災者一百數十村商旅隔絕物價增昂官民苦之
查大康莊以北原有漳河故道填淤高仰無力挑挖必須另籌出
路紳民擬就決口處東趨之勢引入白水潭老衛河至岔河嘴入
現行衛河當飭大名鎮總兵徐迺奎大順廣道羅錦文督同府縣
詳細察勘甚爲直捷便利實得就下之益計自大康莊至白水潭
應開新河五里餘於兩面十丈外出土堆隄佔用民地按畝給價
並免錢糧又自白水潭順老衛河至岔河嘴現行衛河二十五里
餘本有河形隄址須重加挑挖亦就兩面十丈外出土堆隄計開

新河及挖老衛河合土十五萬餘方堆隄方數稱是工程較鉅民
力不支飭徐道奎卽調大名練軍並馬礮隊四營先挑老衛河俾
放上游積水入衛河以便接挑新河而民地亦可早涸原擬由受
益村莊集夫認挑新河旋因民夫未能踴躍做法亦不合式復由
練軍將新河分段加做並築新河老衛河兩隄於二月初開工五
月杪竣事本屆因東明黃河隄塌工程重要先經奏派徐道奎督
率練軍挑辦該鎮遂分軍曉夜趕挑胼胝經營不辭況瘁計黃漳
兩工挑土至三十餘萬方之多使黃河隄塌一律鞏固漳河亦順
軌安流俾大名元城百數十村積潦頓消秋苗徧種興情感戴洵
能異常出力該地方官一再勸懲督飭紳民興辦亦甚奮勉至大
康莊以上至內黃縣界舊漳河南北兩隄已飭民夫量力修培其
在內黃者咨河南撫臣飭修其資捍衛計漳河工程發過地價籽

種遷并費銀二千三百餘兩錢七百餘串搭蓋窩棚置辦器具銀
一千餘兩錢二百餘串購買柁料繩席等物銀四百餘兩錢八百
餘串添雇民夫及犒賞練軍民夫銀二千三百餘兩錢二千二百
餘串雜項錢二百餘串共僅用銀及以錢合銀七千四百四十兩
三錢六分五釐尚屬節省煥實已飭於大名釐金項下撥給應請
就款開銷免造細冊以省繁費其佔用民地錢糧俟查明奏豁此
後歲修仍令照章官督民辦認真經理所有大名漳河工程調派
練軍與民夫合力挑辦完竣緣由理合附片具陳伏乞

聖鑒訓示謹
奏

請停機器鑄錢摺

光緒十四年八月二十日

奏爲新購西洋機器試造制錢核計工本虧折過鉅無從籌補擬請停造恭摺仰祈

聖鑒事竊

臣於光緒十三年正月欽奉

懿旨規復制錢著先購機器一分就天津機器局趕緊鼓鑄備用等因欽此遵飭機器局員前福建藩司沈保靖等定購英國格林活鐵廠造錢機器於本年開河後運到天津業將籌辦情形及價腳等項於上年四月本年三月兩次奏報並聲明西洋機器造法與中國模鑄不同其自鎔銅捲片以至成胚鑿孔印字光胚揆次相連非多建廠座不敷分設事體極爲繁重工本恐多虧折應俟開鑄後核明實需銅鉛各項工本若干再行專案奏辦等因均蒙聖鑒在案

臣督飭沈保靖等於機器運到後即置設局內按照尺

寸修築廠房添配石座並造鍋鑪輪軸車床各項除零星工程及
烤銅鑪捲銅滾軸須隨時添修外其餘均已就緒當於秋初開輪
試造查閱造成制錢字畫輪廓均尚清楚惟機器時有損壞極費
工力緣西洋造錢係屬平面中無方孔壓成較易今以西洋機器
造中國錢式須另添打眼槌桿由錢模正中穿透始能撞出錢孔
地位殊窄撞力過大槌桿上下與錢模互相磨觸最易傷損每日
每座機器模撞修換數次及十數次不等人工既費成數亦少又
土鑄係用生銅鎔灌工料簡易僅用銅五成四鉛四成六機器則
須銅七成方受壓力鉛只三成且必先化成六分厚銅板再用捲
銅斤機器烤捲十數次使其質性純熟減至不及半分厚之銅片
始能壓造成錢其銅片成錢者只六成下餘四成廢邊又須加費
鎔捲再造僅捲銅片一項工料每造錢千文應合銀四錢一分零

加以他項工料爲費甚夥原訂此分機器日長時每日成錢二百四十串今因機器時須修理約計每日成錢二百串臣與沈保靖等逐款摺節科算雖銅鉛市價現在增昂日後冀可稍減而捲銅等項工料實難過省每年成錢七萬二千串共需工料銀十萬七千四百餘兩按制錢一千五百文合銀一兩每造制錢一千約需工本制錢二千二百三十七文七毫虧折未免過鉅直隸貧瘠素著並無閒款可籌非比廣東片有捐項彌補即須全數作正開支計每年機器造成之錢值銀不足五萬兩而工本則需十萬七千餘兩賠貼銀至五六萬兩之多值此庫儲極細必應通盤籌算可省則省現用土法鼓鑄計每鑄制錢一千文不過賠貼三百文左右較機器省至數倍其錢樣亦頗光潔似不如專就土法以節糜費夫西洋機器專以製造金銀錢內可夾用銅鉛質料既省工力

易速價值較昂故甚合算中國所以改鑄制錢每錢一文所值幾何而爲費太鉅應懇

恩暫行停辦前項已購機器仍可留局設法改作別用除將機器造成錢樣及土鑄錢樣咨送戶部查核外理合開具機器試造各項工本細數清單恭呈

御覽所有現購機器擬請停造制錢緣由是否有當伏乞
皇太后

皇上聖鑒訓示遵行謹

奏

謹將新購西洋造錢機器就機器局試造制錢每年以七萬二千串爲率核計應需工本細數開具清單恭呈

御覽

一銅鉛價每年需銀六萬九百三十七兩五錢每千文合銀八錢四分六釐三毫五絲

查每文重一錢每年約造七萬二千串應需銅鉛四十五萬斤按每百斤火耗四斤計一萬八千七百五十斤二共四十六萬八千七百五十斤內七成銅三十二萬八千一百二十五斤每百斤價銀十六兩合銀五萬二千五百兩白鉛十四萬六百二十五斤每百斤價銀六兩合銀八千四百三十七兩五錢再本年銅價漲至十八兩九錢鉛價六兩有零茲酌按銅價十六兩鉛價六兩約計核報

一焦炭每年一百五十噸每噸銀十兩合銀一千五百兩每千文

合銀二分八毫五絲

一煙煤每年二百三十噸每噸銀四兩五錢合銀一千三十五兩

每千文合銀一分四釐四毫

一委員司事薪水每年銀七百二十兩每千文合銀一分

一工匠夫役八十名每名每月攤銀四兩每年共銀三千八百四

十兩每千文合銀五分三釐四毫

查工匠夫役內照料工作匠頭二名看鍋鑪工匠二名看汽

機工匠二名撞錢胚圓片機器二副工匠四名壓成制錢機

器十副工匠三十名車床工匠八名老虎鉗工匠四名光錢

工匠四名烤擦泡洗銅片夫役八名穿數成錢以及擡運物

料雜工夫役十六名共合八十名其捲銅片人工核入捲銅

工料項下開列

一洋土各料物並修配機器等項每年約需銀四千三百二十兩
每千文攤銀六分

一機器價值並建蓋廠座房屋每年攤銀五千兩每千文攤銀六
分九釐四毫

查原購機器價銀二萬七千餘兩局造鍋爐輪軸烤銅爐座
添安車床及捲銅機器又建蓋廠座并零星工程約共需銀
二萬二千餘兩共五萬兩酌按十年分攤

一捲銅片工料每百斤需銀六兩四錢一分一釐五毫每年用銅
鉛四十六萬八千七百五十斤共需銀三萬五千九百九十二兩九錢六釐
每千文合銀四錢一分七釐四毫

查局中捲造銅片向有專廠新購機器捲銅軸三副即於舊

廠安設核計每百斤捲造工料合銀三兩八錢四分六釐九毫惟機器壓錢每銅十成淨造成錢六成下餘廢邊四成須重複鎔捲工料應按十成核算合銀六兩四錢一分一釐五毫計每千文合銀四錢一分七釐四毫內委員司事薪水銀八釐三毫六絲匠人工食銀六分五釐四絲焦炭銀一錢七分三釐六毫一絲煙煤銀七分八釐一毫二絲鎔銅罐及零星雜料攤銀九分二釐二毫七絲

統共每年機器造錢七萬二千串計需銅鉛及各項工料銀十萬七千四百六兩四錢六釐每千文合銀一兩四錢九分一釐八毫每兩按一千五百文計每造制錢一千文應合工本制錢二千二百三十七文七毫

開濬澳工製造船隻片

光緒十四年八月二十日

再非洋創練水師購置鐵甲鋼甲快船身大力重喫水較深不能駛進河口因擇定旅順口內西澳山圍沙互形勢天然堪爲師船停泊之處惟口狹底淤非大加開濬不能展輪下旋前已購造挖海接泥各船勤加疏治其挖出淤泥必須小輪船拖帶出海遠卸方免口內阻塞原值利順小輪船一隻不敷往返拖駛接泥船亦復短少軍用緊要不得不及時添備當飭大沽船塢製造暗輪鋼拖船一隻名曰遇順身長一百二十尺寬二十尺喫水八尺五寸船身用鋼板船面用柚木板造成氣缸三具康邦汽機全副馬力三百五十四匹每點鐘行十二海里極爲堅緻靈捷且艙面平厚有事時即可撥兵設廠爲安置水雷之用實於工程防務兩有裨益計連舢板二隻桅索裝修及一切應用器具物料俱全並隨帶小

火輪舢板一隻除工價由船隔月支經費內開支外實用料價庫
平銀三萬四千一百六兩有奇又月造大小鐵駁接泥船六隻亦
均一律堅固用料價庫平銀三萬九千四百二十七兩有奇均在
北洋經費項下設法湊撥應俟彙案報銷至該輪船常年用款除
煤炭油修一切活支之項難以預定外計配設管駕人等二十六
員名月支薪糧銀四百十四兩並以該船輪機均係新式暫雇洋
管輪馬庚一名指授理法議明當差三箇月期滿即行辭退未經
訂立合同月給薪水銀一百八十兩均自光緒十二年十月分起
在非洋經費項下開支除洋員現已遣撤並將管駕人數倘數開
單分咨海軍衙門戶兵工部外所有開濟旅順澳工製造遇順鋼
拖輪並鐵駁等船緣由理合附片具陳伏乞
聖鑒救下各衙門查照謹

奏

學堂洋員請獎片

光緒十四年八月二十日

再天津創設武備學堂挑選各營聰穎弁兵入堂肄習兵法曾經
屢募德國兵官李寶那珀巴恩士坤士艾德等五員來華派充該
堂教習今已三年均能盡心課導勞瘁不辭俾各生漸通西法著
有微勞據該堂總辦道員楊宗濂等稟請奏獎前來臣查洋員在
華當差出力疊蒙

賞給寶星有案現該堂業著成效在事員弁優等學生已奏奉

恩准給獎該洋員李寶等當差年久事同一律刻屆合同期滿分
別遣留自應照章給予獎敘俾資鼓舞所有李寶及那珀二員係
德國陸路教習擬均請

賞給三等第一寶星巴恩士及坤士又艾德三員係守備官階擬
均請

賞給四等寶星如蒙

俯准卽由臣飭局照式製給並知照總理衙門發給執照以昭信

守理合附片具陳伏乞

聖鑒訓示謹

奏

海防用款立案摺

光緒十四年八月二十日

奏爲光緒十一年北洋海防用款應行立案各項先開簡明清單
奏報隨後造冊請銷恭摺仰祈

聖鑒事竊查光緒元年六月總理各國事務衙門會同戶部議撥
南北洋海防經費奏明由督辦大臣將用款數目咨報總理衙門
及戶部查核原以籌辦海防事屬創始一切用款皆無成例可循
亦非他項軍需可比是以僅令將用款數目咨報嗣於八年十一
月九年八月戶部議奏報銷程式並定戶兵工三部分銷章程又
令於事前奏明報部立案事後方准核銷等因臣以立案之意必
部中無案可稽者始行奏咨以備核銷時有所稽考其曾經報部
有案及常年照章支用各款自無庸再行立案北洋海防取法泰
西諸國凡購物製器用人頭緒太多鉤稽匪易擬每屆一年將應

行立案各款奏咨一次庶辦理可期簡易而稽核亦有依據疊經奏咨在案所有九十兩年用款前已造冊奏咨請銷並准戶部核覆茲查光緒十一年正月起到十二月底止經支北洋海防經費除舊有各船艇魚雷水雷各營原支薪糧煤斤號衣旗幟水師學堂行營製造常年經費機器工程軍械子彈藥火各項廠庫局所華洋文武員弁人等薪餉軍械所鑄造鉛丸起卸礮械工價各臺牆礮費馬乾卹賞一切照章支用款項暨找付九十兩年分訂購外洋軍火機器等項價值旅順口挑築澳壩工程及雜支各款十年以前報部有案者均無庸再行立案又大沽船塢武備學堂電報總分各局薪費並水師公所內暫作學堂添造住房及定遠鎮遠濟遠三艦薪糧十一年十二月以前由北洋防費支給均經專案奏咨雇募各國洋員教習薪水川資等費亦將合同鈔錄送部

其淮軍報銷局剔歸海防收銷造子辛工業由該局報部奉准亦均無庸再行立案此外采買製造並新添大魚雷艇及原有各船添募員弁人等薪糧暨一切新支用款應遵照部文按款摘敘案由支數分別彙冊先行奏咨立案飭據海防支應局司道查明具詳前來臣查光緒十一年春開法釁未弭海防戒嚴北洋拱衛

京畿沿海千餘里前經疊奉

諭旨嚴密防範起建臺壘庫廠增購軍火器械應付工料價值及舟車轉運之費固屬必不可少卽法約定後籌度未盡事宜揆以現時財力凡必不可緩之工必不可缺之器不得不分年舉辦以期有備無患然皆力求樽節並無絲毫浮濫所用各款詳細數目統俟造銷時再行分晰開報除將清冊分咨戶兵工部外理合彙繕簡明清單恭摺具陳伏乞

皇太后

皇上聖鑒謹

奏

謹將光緒十一年正月起到十二月底止動用北洋海防經費應行立案新支各款開具簡明清單恭呈

御覽

薪糧及雜支項下

一 大沽水雷營改派會帶官一員月支薪水銀四十兩添派書識一名月支辛工銀八兩繙譯學生一名月加薪水銀六兩值電學生一名月支薪水銀十兩

一 旅順魚雷局添派司事一名月支薪水銀八兩字識二名各月支辛工銀四兩

一 水師學堂駕駛管輪各學生第三屆考試月支贍銀一百九十七兩五錢

一 大沽水師船塢添募學徒三名長夫六名共月支辛工銀四十

四兩

一旅順新設電燈經理匠役人等八名其月支辛工銀四十七兩

五錢

一委辦水師營務處法文翻譯中書羅臻祿月支薪水銀六十兩
公費銀四十兩文案舉人鄭孝哲月支薪水銀三十六兩

一洋鎗隊教習楊榮泰月支津貼銀八兩

一正定練軍緝譯吳器堂月支薪水銀四十兩

一出使德國隨員同知楊兆璣回德川資銀六百五十五兩

一中書羅臻祿派赴澎湖與法酋會商川資公費銀二百十四兩

一錢零

一撥還船政墊給委員陳文祺學生李壽萱周銘西由閩來津川
資銀一百九十兩九錢零又調募三艦需用大二三副管輪人等

並前調繪圖學生共二十四名由閩來津川資銀一千一百七十
四兩五錢零

一英人敦約翰赴外洋辦公川資等銀三千四百三十八兩九錢
零

養船及連腳保險項下

一水師添練水手三十名其月支口糧銀一百二十兩

一威遠練船添練學生三十名並派聽差伙夫等七名其月支銀
五百十六兩

一水師屯船添派醫士一名月支薪水銀十八兩

一水師操練營務處月支公費銀五十兩

一水師添調閩廠教習學生龐銘世等七名其月支薪水銀一百

十兩

一水師候差學生何廣成等三名其月加支銀十兩

一水師官醫生曹茂祥何廷樞周傳謬三名其月支薪工銀九十

兩

一查調閩廠千總陸麟清月支薪水洋銀一百二十元

一右隊二三號大魚雷輪艇二隻每艇配設管駕人等三十二員

名其月支薪糧銀九百八十二兩

一三艦洋教習克鹿庫衣甫蘭脫等二員其月加薪水銀二百兩

一起援朝鮮臺灣弁勇及軍械等項在山海關駁運其支銀二百

四十兩二錢零

一上海招商局選募三艦需用管輪管油汽升火人等一百四十

名由滬至津水腳銀一千七兩零

一武備學堂學生赴山海關學習測量水腳銀六百四兩

一購水師應用海道圖等項水腳銀二十六兩九錢零

一續購燐銅魚雷二十尾運保等費銀七百三十兩五錢零

一購超揚兩快船加重鐵鎗並備用零件運保等費銀二百五十

八兩零

一購旅順水雷營需用直斜測鏡等項并備用零件運保等費銀

七十八兩二錢零

一購力拂廠管爐汽機等項驗運保險等費銀三千二百九十五

兩八錢零

一購阿摩士莊廠礮彈等項運保等費銀三百八十七兩四錢零

又單管哈乞開司礮位子彈等項運保等費銀二千九百八十六

兩零

一水師及旅順魚雷營購買刷次考甫廠拆雷定雷各項器具運

保等費銀五百六十九兩七錢零

一水師學堂購管輪學生練習手藝機器并配用各項器具運保

等費銀六百四十二兩九錢零

一招商局輪船承裝魚雷鎗礮子彈等件由旅順口運至天津水

脚銀一千九十五兩六錢零又拉火等件由天津運赴山海關水

脚銀九百三兩九錢零又棉藥等件由天津運至旅順口水脚銀

五百三十七兩七錢零又礮位等件由天津運至旅順口又由旅

順口承裝礮件運至天津水脚銀四百八十二兩零又洋鎗等件

由滬至津水脚銀五百四十三兩六錢零又礮位礮架等件由津旅

等處運至山海關水脚銀一千四百五十五兩七錢零又黎意鎗

鎗子隨鎗零件由滬運津水脚銀二百九十六兩零又兵鎗鎗子

由滬運津水脚銀一千六百五十四兩三錢零又礮彈及軍門丁

油山天津運至旅順口水腳銀一百六十五兩三錢零又礮位鐵架千斤柱等件由滬運津水腳銀一千二百二十五兩九錢零
一軍械所雇英商帶水駁船裝運礮械等件水腳銀一百四十三兩二錢零

一招商局輪船由天津赴澎湖裝送官弁勇夫八百三員名至廈門水腳銀一千二百三十兩又派赴朝鮮裝送慶軍等營官弁勇夫二千四百五十八員名至旅順口水腳銀一萬八百十五兩二錢又由天津駛赴香港承裝礮位等項運至天津旅順等處水腳銀三千七百七十二兩七錢零

一上海地亞士洋行轉運德國購存鐵件化學器具等物由滬至津水腳銀一千五十一兩零

一大沽船塢撥發水師輪船煤噸駁費銀二千八百六十六兩二

錢零

一天津旅順仁川等處卸運水師雷營及挖海工程需用煤噸共支損駁等力銀一千四百六十兩八錢零

采買及修製項下

一購阿摩士莊廠礮彈等項價銀二千九百五十七兩一錢零又單管哈乞開司礮位子彈等項價銀一萬九千九百五十五兩零又馬克綏姆礮位子彈價銀二萬一千二百七十九兩二錢零一行營製造局添備仿造呔嗜士得鎗子機器銀九千六百四十九兩七錢零

一購新載生洋行哈乞開司鎗子價銀二萬一千兩又格林礮子價銀二千五十一兩一錢零又克鹿卜後膛礮門等項價銀一千一百七十三兩六錢零又旱電綫價銀五百二十六兩四錢零又

起重架等件價銀二千三百五十四兩六錢零又旅順水雷營直
斜測鏡等項價銀五百七十二兩三錢零又洋號等件價銀四百
五十九兩七錢零

一購克鹿卜十生脫半新式後膛鋼礮並子彈先支價銀一萬四
千三百九兩二錢零

一購黎意鎗鎗子隨鎗零件價銀二萬二千七百五十一兩三錢
零

一購哈乞開司陸路礮架價銀二百二十八兩一錢

一水師及旅順魚雷營購德國刷次考甫廠拆雷定雷各項器具
價銀一萬三百三十三兩八錢零

一水師購用海道圖等項價銀一千八百九十九兩七錢零

一水師學堂購教練魚雷需用壓汽機等件價銀五千二百九十

五兩二錢零又購管輪學生練習手藝機器并配用各項器具價銀七千五百七十六兩五錢零

一軍械所購備用電機價銀七百三十八兩九錢零

一購氏那米脫炸藥價銀二千九百九十五兩九錢零

一購毛瑟鎗圖說等項價銀七百八兩五錢

一武備學堂購印石印銅器具料物等件價銀一百五十二兩零

一購超揚兩快船加重鐵錨并備用零件價銀一千二百六十二

兩二錢零

一旅順魚雷營購雷廠雷艇修製操習需用大批料物價銀一萬

七千二百兩九錢零又定製洋帆布煤袋工料銀二百七十五兩

四錢零

一山海關水雷營購應用料物電機等項價銀七百七十七兩三

錢零

一購水師機器廠需用各項料物價銀一百三十八兩六錢零

一購洋皮紙價銀九百七十八兩六錢零

一購青鉛價銀二千三百三兩四錢零

一額撥旅順魚雷營添購修製魚雷零星料件經費每季支湘平

銀一千兩

一水師學堂由機器局派雇匠工安設管輪學生練習手藝機器

并撥各項料件工料銀八百五十二兩二錢零

一軍械所添製圓式裝藥皮桶等件工料銀二百五十七兩六錢

零

一機器局撥發兩號魚雷船需用各項料物價銀六百六十二兩

錢零

一威遠練船添購學生需用紙筆顏料並盤碗等件價銀一百三

十一兩七錢零

一武備學堂購印字機器價銀一千二十一兩九錢零又購測量
機器西洋書籍圖畫筆墨紙張並置備傢具等項價銀二千二百

八十三兩九錢零

一水師購辦練船學生需用書籍紙筆並機器廠需用料物等件
價銀八百九十二兩七錢零

一製造頒賞洋員金寶星工料銀一百五十一兩三錢零

一津勝營駐紮臨榆縣境修築營壘及取土之地佔用民地租銀

三十五兩三錢零

一建造武備學堂購買民地並籽種工本及巡房費銀六千四百

八十一兩九錢零

一旅順礮臺監工洋員漢納根合攏起重船工料價銀九千兩

一光緒十年分定購德國魚雷巨艇一艘運至上海祥生懋洋廠

合攏並添配應用各物工料價銀五千一百八十二兩四錢零

一大沽船陽十一年春季修理六鎮礮船並添置備用各件料價

銀五千六百四十九兩七錢零又修理威遠練船並添置備用各

件料價銀一萬二千一百十八兩七錢零又修理海鏡輪船並添

置備用各件料價銀一萬一千八百五十七兩四錢零又修理飛

霆桿雷兩號小輪船並添置備用各件料價銀五百三十四兩八

錢零又十一年秋季修理六鎮礮船並添置備用各件料價銀八

百三十兩一錢零又修理超勇揚威康濟等三船並添置備用各

件料價銀二千七百四十二兩六錢零又修理飛霆小輪船並添

置備用各件料價銀七百九兩二錢零又修理快馬小輪船並添

置備用各件料價銀七百九兩二錢零又修理快馬小輪船並添

換各件料價銀一百八十兩二錢零又修理大沽水雷營廣艇一號舢板四號料價銀九百四十五兩九錢零又承造洋河口外安設水雷需用十四槳舢板二隻工料價銀一千一百九十兩二錢零又承造大沽海口南北兩岸各臺牆礮洞添設鐵礮門三十二副料價銀四千八百五十七兩三錢零

一大沽船塢代旅順工程局購造接泥船十隻需用鐵件價銀二千五百兩六錢零

一大沽船塢彙報光緒十年分修理大沽海口兩岸各營雷電礮械及電燈等項工料銀七百二十一兩一錢零

一超勇揚威兩快船光緒十一年分赴上海祥生懋洋廠油修船面船底並機器檔牌及添備應用料件工料價銀一萬六千七十

九兩七錢零

一魚雷營專造操習六槳舢板六隻料價銀八百五兩四錢零

一行營製造局代山海關水雷營造起重大船一隻工料銀五百

三十六兩九錢

一快馬及守雷下雷小輪船三隻守凍包紮船面及搭蓋住棚需

用薦繩等項工料銀一百五十兩八錢

一月建武備學堂並演武廳及水龍廠等計大小房屋五百二十

九間又圍牆一道濠溝一道磚木橋五道工料銀五萬三千五十

三兩七錢零

一旅順工程局添建砲頭山大礮臺下牆臺一座礮盤六座子藥

庫一座濠溝一道兵房二十間圍牆三道工料銀三千九百四十

七兩六錢零又建築牧豬礮臺一座子藥庫兩座兵房九間護

牆一道坡牆一道工料銀一萬九千三十九兩三錢零又修改鐵

子營礮盤四座土牆二段並添建礮房庫屋五座工料銀四千二百五十四兩八錢零又建築老虎尾低勢土礮臺一座計礮盤兩座礮房一座子藥庫兩座兵房二十二間並濠溝濠牆等工料銀六千八百二十九兩八錢零

一洋員漢納根經造旅順水陸弁兵醫院及教習住房共三十一間并購備醫治傷病外國藥料器具工料價銀四千一百六十六兩一錢零

一旅順魚雷營建築收存魚雷艇臺旱塢並圍牆石溝石壩庫屋煤圈碼頭等項工料銀一萬三千一百二十七兩六錢零又製造黃龍旗並各國旗幟十二面工料銀六十九兩六錢零又製給新兵應需號衣褲並號帽靴等項工料銀八百九十兩一錢零

一旅順水雷營建造講堂料庫住房廠棚直斜鏡房旱雷電房計

七十一間並營門石碼頭圍牆工料銀一萬一千五百四錢零
一旅順護軍營修造收儲軍米軍裝房十八間工料銀一千二百
五十四兩四錢零

一北塘水雷營建造直斜鏡房二座工料銀六百六十九兩一錢
零

一朝鮮仁川海口修建存煤木柵一座板房一座工料銀五十六
兩七錢零

一旅順防次由洋員漢納根經設電燈工料價銀一千二百二十
四兩零

一水師學堂製給派上練船學生各項號衣褲號帽戰靴等件工
料銀六百四十七兩七錢零

一駐防大沽北岸保定練軍左營添設石頭縫臺牆克鹿卜八生

脫後膛鋼礮四尊共月支礮費銀十八兩

一山海關甯海城等處添設礮位十四尊共月支礮費銀七十九

兩

一旅順口東岸黃金山礮臺及人字牆添設礮位六尊共月支礮費銀十九兩
一牧豬礁礮臺安設礮位四尊共月支礮費銀十八兩
一嶗嶗嘴礮臺添設二十一尊
一脫後膛鋼礮三尊共月支礮費銀二十四兩
一西岸饅頭山城頭山巒子礮威遠各礮臺安設礮位十二尊
共月支礮費銀六十四兩

查以上各款均係十一年分新增支項應遵部章先行奏咨立案其一切例支款項及業經奏咨者毋庸再行立案均未開列理合聲明

和龍峪經費片

光緒十四年九月十三日

再吉林與朝鮮互市貿易於和龍峪西步江光霽峪分設局卡派

員經理應需經費前經臣會同吉林將軍奏准由山海關出使經

費項下按結撥銀三千兩聲明候試辦三年後彙核所收進出口

稅能否足敷局卡用度再察酌情形會商具奏等因嗣戶部以該

局卡自光緒十一年十一月開徵起運間至十三年六月計十年

零八箇月僅收稅銀一千一百餘兩是一年收數不敷一月之用

應否令該省將薪水等項核實刪減抑或准其照舊辦理咨由總

理衙門轉咨到直業經臣商准吉林將軍擬於十四年七月起每

結刪減銀八百兩咨覆總理衙門在案茲又准吉林將軍咨轉據

吉朝商務委員秦煥稟稱吉朝通商原擬俟刷還流民酌撥防軍

再行舉辦旋因俄人與朝鮮有陸路通商之議慶興府與俄鎮兩

處人民往來甚密是以亟設局卡藉可杜漸防微該處皆曠野空山時有盜賊出沒朝鮮關非一帶地方因之不靖自經設局聯絡朝員梭巡稽察匪類斂跡凡遇無告窮黎量力安置韓民入我境者儼有樂郊樂土之思其交涉事件亦無不推誠布公和衷商辦至越壘韓民爲數既眾往往與華民爭壘互毆局員平其曲直使彼此息忿否則怨不在大積久易滋事端理春敦化遠在三五百里以外若非該局就近撫馭實無以安民心而弭隱患惟和龍峪一帶人煙稀少居民貧苦異常朝鮮沿江各府更無富商大賈是以貨物銷售有限稅收不旺現值該局試辦屆滿所收稅數如此微細就目前而論似非裕財之道就久遠而論實亦撫治邊陲維繫韓人之策所有商務經費擬奏明展限三年俟將來人民富庶稅務振興再截止出使經費等因前來臣查吉林和龍峪一帶分

設局卡本欲搗糜韓民非爲多收稅項若遽裁撤恐於時局有礙
現既彙核稅項不敷局卡用度自應將所需經費展限三年仍由
山海關按照刪減數目每結解交銀二千二百兩撙節動用俟限
滿能否就稅項挹注再行察酌奏辦理合會同吉林將軍臣長順
合詞附片具陳伏乞

聖鑒訓示謹
奏

德員請獎片

光緒十四年九月十三日

再北洋前在德國訂造經遠來遠鐵甲快船兩號工竣回華經臣
驗駛奏報在案查中國在外洋訂造鐵艦必須該國海部相助爲
謀方能精堅台用今兩艦自訂造以迄驗收凡棚式選材及試行
速率力求礮位等事皆經出使大臣商由海部派員前赴工次認
眞襄理況粹不辭洵屬殫域無分效忠出力而外部大臣甲士馬
克係該國相臣之子曾營屬海部盡心助辦願全睦誼又克虜伯
伏爾鏘兩廠主皆充商務議員於中國歷屆造船造礮事宜尤能
始終奮勉自應分別獎敘以酬勞勩疊准出使德國大臣許景澄
洪鈞查明尤爲出力之畢士馬克等八員擬給寶星等第並聲明
海部兵部其次出力各員俟續有勞績再行酌辦等因咨會前來
臣覆核並無冒濫與前次訂造定遠等艦請獎洋員之案相符謹

繕單恭呈

御覽仰懇

天恩俯准照擬賞給寶星俾昭激勸並請

敕下總理各國事務衙門照章製備頭等第三二等第三寶星三而其三等者五面由工部局製備統由總理衙門印發執照分別咨行寄交洪鈞按名頒給理合附片具陳伏乞

聖鑒訓示謹

奏

謹將訂造經遠來遠快船兩號尤爲出力之德國洋員擬請
獎勵開具銜名清單恭呈

御覽

計開

總理外部大臣畢士馬克擬請

賞給頭等第三寶星

海部燬火軍械總辦蓋斯勒爾與各國總稅務司相同擬請

賞給二等第二寶星

海部專管造船機器畫圖等事部辦格烈士查驗船料部辦蘇爾

次與各國二三等參贊領事官相同又歷屆經手造船出力之駐

德使館洋緝譯官二品頂戴總領事銜金楷理均擬請

賞給三等第一寶星

海部專管海口礮臺軍械所兵官克乃勃而與各國遊擊相同擬

請

賞給三等第三寶星

克虜伯礮廠主二品商務議員克虜伯與各國總領事官總教習
相同擬請

賞給二等第三寶星

伏爾鏗廠主三品商務議員舒羅杜與各國副領事官相同擬請
賞給三等第二寶星

潘鼎新請祀昭忠祠

光緒十四年九月十三日

奏爲已故大臣勳勞卓著被議之後立著戰功懇

恩開復原官人祀淮軍昭忠祠恭摺仰祈

聖鑒事竊查開復銜翎前廣西巡撫潘鼎新於光緒十四年五月十三日因瘴疾猝發牽動傷痕在籍身故查潘鼎新由舉人議敘知縣於同治元年募立鼎軍隨臣率師赴滬克復蘇之川沙奉賢金山南匯浙之嘉興烏程平湖湖州各城同治四年擒逆北竄突

偏

設輔臣檄調潘鼎新首率所部航海赴津轉戰無前屢獲大捷東

擒既平西擒讎至其時淮軍諸將大半假歸復令潘鼎新星夜督隊北援張總恩股匪方圍保定省城圖犯易州遂能抄出賊前保

護

陵寢歲定二擒肅清三省論功最多而赴援之速尤冠諸將疊蒙特恩賞穿黃馬褂頭品頂戴雲騎尉世職仰承

知遇海擢封圻歷任雲南巡撫署湖南巡撫調任廣西巡撫光緒十一年二月以諒山失守罷歸當法越事亟滇廣辦防而桂邊獨當兵衝尤爲重要法營宣言必奪諒山驅華人出越境事乃可了其蓄意已非一日該故撫受任於兵事糜爛之後倉卒出關收集傷亡激勵將士始有觀音橋之捷士氣漸振疊獲勝仗擒斬要酋支持年餘迨十年十二月間諒山之役法人盡銳以全力來攻該故撫督淮桂兩軍奮死搏戰援軍近接飛催不前獨以孤軍撐拄強敵身受重創力竭退師失事之先該故撫電奏有掣肘萬分惟有死報之語張之洞電奏亦有可謂力戰特敵太猛之語蓋所處之地實屬萬難眾論同聲非由飾說諒山失陷之時

朝廷鑒其危苦有戴罪圖功之

溫諭有各軍悉歸調遣之

嚴旨該故撫乃能仰奉

天威部勒眾將規取故地誓死爲期遂於二月初間疊有鎮南關連日之大捷該故撫親自督師出關追剿再戰再勝又於二月十三日克復諒山乘勝進業觀音橋攻取谷松方擬進攻船頭各處旋於途次接奉革職之

命既解兵柄然後折回先是法來議盟索地貴償諸多要挾經此屢敗該國以爲用兵越南以來未有如此疊次大衄者敵氣中挫款議乃成關係大局誠非淺鮮同時諸將論功皆受上賞而該故撫以統兵大員身親前敵已失之地一時盡復功罪實足相抵獨以業經罷職未荷

恩施當時既不能自言事後亦莫爲追論齋志歿地深可憫傷臣
惟潘鼎新於淮部諸將贊勞最深屢爲軍鋒再平巨寇雖諒山失
律咎無可辭終能轉敗爲勝大振

國威進取方銳受代遞還較論前功未可盡沒該故撫業經海軍
衙門奏奉

懿旨開復原銜翎枝合無仰懇

天恩俯念該故撫於被議之後立著戰功

准予開復原官入祀淮軍昭忠祠以昭忠盡出自

逾格恩施所有已故大員勳勞卓著懇

恩開復耐祀緣由理合恭摺具

奏伏乞

皇太后

奏
皇上聖鑒訓示謹

海防練軍報銷摺

光緒十四年九月十三日

奏爲查明天津海防練軍光緒十三年分收支各款照章造冊請銷恭摺仰祈

聖鑒事竊據天津支應局司道詳稱津郡練軍及大沽葛沽北塘各礮臺防營並雲字營馬隊營務處小隊應需餉項向由津海關六成洋稅招商局稅洋築釐捐東海關協餉長蘆鹽斤復價正雜課各項下隨時籌撥撥節支放業將光緒十二年前收支款目彙次奏咨准銷在案查東海關六成洋稅現因湊付神機營原借洋息難以協撥津軍月餉不得已暫於天津釐金項下挪墊已彙開清單咨部至應支餉乾薪公等項並大沽等口臺礮經費以及設局辦公租賃民房添置帳棚旗幟號褂采買製造軍火器械悉照奏定章程歷年准銷成案核實支放其新增者隨時咨部立案

茲據該司道造具十三年分收支細數清冊詳請
奏咨前來臣逐加覆覈自光緒十三年正月初一日起至年底止
舊管存銀三萬一千八百十六兩零新收各款並本案扣收平餘
銀四十萬二千四百八十九兩零開除支款應歸戶部核銷銀三
十七萬九百六十一兩零工部核銷銀三萬六千八百四十八兩
零合共銷銀四十萬七千八百九兩零應存銀二萬六千四百九
十六兩零已支發十四年分餉項列入下屆滾接造報至奉部核
准歷年墊支不敷銀二萬一千一百七十八兩零仍於冊內列報
應俟月案核辦後再行開除所有光緒十三年天津海防練軍收
支餉銀請銷緣由除清冊咨部外理合恭摺具

奏伏乞
皇太后

奏
皇
上
聖
鑒
收
部
核
銷
謹

請病假片

光緒十四年十月十四日

再臣於九月間感受風寒侵入頭面筋絡致左目昏蒙發赤視物模糊左腮上下筋脈抽搐口角向右牽曳高邪胃納減少精神疲憊診治多日尙未就痊醫者謂由年衰血弱外邪易人必須避風靜養始可漸愈擬懇

恩賞假二十日俾資調理一切緊要事件仍當力疾籌辦不敢稍涉貽誤理合附片具陳伏乞

聖鑒訓示謹

奏

再保桂本誠片

光緒十四年十月十六日

再道員用候補知府桂本誠上年搶辦通州潮白河合龍大工經
臣奏保奉十月二十一日

上諭著以道員候補轉行欽遵在案旋准吏部咨桂本誠河工出力應照尋常勞績另核請獎未能照尋常勞績免補知府本班等因臣查河工出力人員如常年修工防汛應按尋常勞績辦理如搶堵合龍大工應接異常勞績辦理歷年各省成案部中亦未概照尋常勞績核議潮白河挾塞外諸山之水經密雲順義等縣會合諸水併流下注向稱湧猛且近在

皇畿關繫運道民生甚鉅上年於通州北寺莊漫口三百餘丈大溜東趨入箭桿河地勢西高東下欲其西入北運河極爲棘手桂本誠會同通永道許鈴身籌畫調度督率員弁躬歷危險胼胝經

營竟以人力逼溜硬轉刻期搶堵合龍全河復歸北運故道俾百餘萬新漕源源濟運東路之通州三河香河寶坻甯河一帶被水田畝亦及時涸復實能力任艱苦卓著勤勞有裨大局今年又委辦該河善後各工防護大汛妥籌布置化險爲平一律穩固洵屬不遺餘力直隸河道狹隘兩岸民田廬舍櫛比隄埝又土性鬆浮平時修築本難而挽狂瀾於既倒尤甚不易若獎敘不稍示優異殊無以鼓舞人才合無仰懇

天恩俯念畿內巨河合龍大工非尋常修搶可比桂本誠勞績異常與歷辦准獎免補成案相符

收部仍遵前奉

諭旨將桂本誠以道員候補以昭激勸是否有當理合附片具陳伏乞

聖鑒訓示謹
奏

再請病假片

光緒十四年十一月初五日

再臣前因感受風寒侵入頭面筋絡請假調理奉

硃批著賞假二十日安心調理欽此仰蒙

聖慈體恤逾恆曷任感激臣多方醫治左目浮腫漸消而背赤流
淚不止視物仍覺昏蒙腮頰上下筋脈拘攣運動不靈口角高邪
如昔飲食言語均尙艱澀醫者謂由年老血虧風邪襲入腠理必
須避風靜養數旬可冀除根非急切所能全愈合無籲懇

天恩再

賞假一月俾得靜心調理逐漸就痊

微臣

任重事煩精力日憊猝

嬰末疾幸未深入膏肓月來未能出門酬接賓僚而緊要公事仍
不敢不力疾料理謹附片具陳伏乞

聖鑒訓示謹

中法接續摺
光緒十四年十一月十二日

奏爲滇粵邊界中國電綫與越南北圻法綫相接藉收越南通緬
印度等處商報之利現已議定章程恭摺仰祈

聖鑒事竊於光緒十二年十月准總理各國事務衙門咨開據法
國駐京公使照會以廣西邊界中國電綫距越南東京法國電綫
甚近若彼此接連受益不淺咨查有無窒礙等因飭據總辦電報
事宜東海關道盛宣懷稟稱法國陸路電綫自鎮南關邊外起以
達越南東京至西貢並通越南各內地又由西貢接通英綫至暹
羅之都城彭高地方且繞出緬甸至印度等處中國陸綫如與接
連則價口較海綫便宜以上各處電報皆由此綫轉遞獲利誠
於中國有益中國電綫既與英丹海綫接連法綫事同一律祇須
章程嚴密中國界內不准該國陸綫侵越尺寸地步亦不准該國

設立電局無事時不妨接綫以收利益有事時仍可斷綫以示隔絕自無窒礙等情業經咨商總理衙門核准照覆法國公使允其接連在案臣即分咨粵省督撫臣查照一面飭盛宣懷會商粵電局妥辦旋據盛宣懷稟稱奉兩廣督臣張之洞批示亦以祇須中國界內不准該國陸綫侵越爲關鍵今年七月法國駐津領事林椿奉其本國之命前至煙臺會同該道擬就廣西之鎮南關電綫與越南北圻之同登地方法綫相接事宜十一條並另加專條大致以設局造綫彼此各至分界處所爲止不准侵越邊界尺寸地步其餘係傳報章程及報費數目惟第二條內該國擬請廣東邊界之東興電綫與北圻之芒街即蒙開法綫相接又雲南邊界之蒙自電綫與北圻之保勝即老開法綫相接雖均爲初議所未及但東興蒙自兩處邊綫並無商報其費皆出自公家若准連接亦

可藉收商報於養綫經費不無裨助且與鎮南關情事相同經臣
照錄所擬章程咨准總理衙門覆稱添接東興蒙自兩綫核與接
綫原議事屬一律詳閱各條尙無窒礙難行應如所議辦理並擬
入萬國電報公會及第十條法郎兌價隨時增減之說稍欠分曉
應更正等因復飭據盛宣懷稟稱萬國電報公會願入卽入與此
約無干不必添列至第十條法郎增減遵已更正並將前次繙譯
字義稍有未符之處妥細核對準確連專條統訂爲十二條林椿
以時屆封河卽須回津請卽在煙臺暨押並請奏明遵行該道遂
電請臣與總理衙門覆准卽於十月二十八日將所訂章程與林
椿畫押蓋印訂明鎮南關一綫俟中國奏明奉准卽行接連東興
蒙自兩綫俟奉准後十八箇月內再接計繕漢文法文章程各四
分法國應執兩分中國電報總局存留一分其餘一分稟送前來

臣查外洋各國電綫彼此相接以通平日商報而資養綫經費各國均無禁止接綫之例卽如法德鄰邦世仇日相窺伺而電報仍往來如織蓋有事時明斷其綫暗阻通信我可自主並無窒礙中國電綫久與英丹兩綫相接藉通中外消息甚於大局有神今與法綫接連藉收商報之利有事時斷綫阻信仍可操縱由我除飭盛宣懷隨時會商滇粵電局妥慎辦理並將送到印押漢洋文章程一分咨送總理衙門備案暨分咨滇粵督撫臣查照飭遵外理合照錄章程恭摺具陳伏乞

皇太后

皇上聖鑒訓示謹

奏

謹將東海關道盛宣懷與法國駐津領事林椿議定滇粵邊
界中國電綫與越南北圻法綫相接章程十二條照繕清單
恭呈

御覽

第一款

中國法國在中國與北圻邊界相接電綫以通條款內所註明之
所有一切電報

第二款

中法電綫訂明在三處相接

一法國在北圻之同登地方電局與中國廣西省之鎮南關電局
互相接綫

二法國在北圻之芒街卽蒙開地方電局與中國廣東省之東興

電局互相接纜

三法國在北圻之保勝卽老開地方電局與中國雲南省之蒙自電局互相接纜

此條款俟奏明中國

國家批准之後鎮南關與同登兩局迅速接纜至於東興與蒙開並蒙自與老開兩處訂明條款

批准後十八箇月之內接纜

第三款

中法兩電報總局所應辦之邊界相連接纜及保護修理電纜並設局管理電纜以上各項兩國彼此在本界限內各自出資辦理約明均不侵越邊界尺寸地步兩電局互相接纜之後卽用此纜傳遞電報

第四款

所有電報山中法相接之旱綫收發傳遞者均照萬國公例所定歐洲以外電報章程辦理至於中國與北圻越南西貢真臘來往電報算字一節照萬國公例所定歐洲以內電報章程辦理

第五款

所有電報經過中法兩電局旱綫者以兩國界限爲止各自定價收資惟兩局約明照此條款之第六款註明價目取資條款年限以內不得再有加增如須減價各隨其便

第六款

照第二款議定接續之後傳遞電報價目每字取費若干列明於左

一中國電報局於中國全境各局與他國來往電報每字取資價

目越南北圻西圻真臘暹羅等處電報由中國與北圻邊界相接
之纜傳遞與中國之廣東廣西雲南各局來往者每字七十五生
丁所有各局在長江以及長江以南來往者每字一法郎二十五
生丁除朝鮮外所有各局在長江以及長江以北來往者每字二
法郎二十五生丁朝鮮各局來往者每字二法郎五十生丁
二所有中國全境各局與歐洲並歐洲過去各國來往由中國北
圻邊界相接之纜傳遞者每字五法郎五十生丁

三所有他國電報由中國北圻邊界相接之纜與中國廣東廣西
雲南各局來往者每字一法郎所有各局在長江以及長江以南
來往者每字一法郎五十生丁除朝鮮外所有各局在長江以及
長江以北來往者每字二法郎二十五生丁朝鮮各局來往者每
字二法郎五十生丁

四所有電報歐洲並歐洲過去諸國由中國北圻邊界相接之綫
傳遞經過中國全綫至中國各處邊界轉遞來往者每字五法郎
五十生丁

五所有電報由中國北圻邊界相接之綫傳遞與香港來往者每
字七十五生丁廈門福州上海來往者每字一法郎二十五生丁
中國各處邊陸轉遞來往者每字二法郎五十生丁

法國電報價目

一所有電報由中國邊界旱綫傳遞與北圻來往者每字十五生
丁與越南來往者每字三十生丁與西貢真臘來往者每字四十
五生丁

二所有電報由中國邊界經過法綫與他國來往者每字五十生
丁與海防上岸之水綫來往者每字二十生丁與越南京城順化

上岸之水纜來往者每字三十生丁與西貢上岸之水纜來往者每字五十生丁

第七款

上款註明之中法兩電局所有各電報分局地名另行鈔錄一紙黏於條款之後

第八款

寄報之人如不註明由何路傳遞中法兩電局議定如中法相接之旱纜價目較別路便宜此等不註明何路傳遞之報全歸中法相接旱纜寄發如中法相接之旱纜價目與別路一樣此等不註明何路傳遞之報最少一半須歸中法旱纜寄發

第九款

中法兩電局邊界接綫之兩分局每日須將來往電報之字數對

清所有帳目須於每月月底結算清楚帳目數尾應歸法電局者即交付西貢之法國電報總局應歸華電局者即交付上海之中國電報總局須不得過每月結帳後十日之外一律付清所有算帳付帳電報均作二等公報月分日期均照西曆

第十款

算付帳目全用洋銀每法郎作洋銀二角六分

第十一款

此條款畫押即行奏請中國

國家批准之後便可照辦並約明畫押之後以十五年爲期限期滿之後不論何時或中或法如欲將此條款停止以及更改應於六箇月前預先知照如不於六箇月以前知照要停止或要更改則仍行照前辦理惟中法兩電報局訂定將來中國與歐洲以及

歐洲以外諸國來往電報價目照現在中國電報局與東北兩海
綫公司簽定者如有所更改則法國電報局亦得照樣改減

第十二款

雲南蒙自與北圻老開相連電綫因前款言明十八箇月方能接
綫今約明蒙自老開兩分局未接綫之前如有電報由中法別處
相接之綫傳遞與雲南來往者仍照各局在長江以及長江以南
者第六款所定報價一律取資

光緒十四年十月二十八日

西曆一千八百八十八年十二月初一日

海軍俸餉悉照新章摺

光緒十四年十一月十二日

奏爲北洋海軍俸餉等項擬自光緒十五年正月起悉照新章辦理以清界限恭摺仰祈

聖鑒事竊照海軍衙門擬定北洋海軍章程前已繕冊具奏奉

諭旨依議欽此當經轉行欽遵分別開辦茲查章程內俸餉等項現在釐定之數與向發數目多寡均有不同本年冬季薪餉因各輪艇紛紛具領已照向章陸續發給年內不便改發應請自光緒十五年正月初一日起將海軍俸餉等項均照新定章程辦理海軍提鎮等官有補缺在先者其俸餉亦自來年正月起照新章開支以歸一律所有向發薪餉等項既與現定俸餉新章不同卽於光緒十四年十二月底截止仍歸北洋防費舊案造報其自來年正月起照新章收支海軍經費另作起訖造冊按年報銷以期各

歸各款免致牽混至工需雜費新章所定係屬約略大數將來如有變通增減之處應如何截長補短勻搭支用隨時察酌情形核實辦理飭據海防支應局司道具詳前來臣覆核無異除咨海軍衙門戶兵部查照外所有北洋海軍俸餉等項擬自光緒十五年正月起悉照新章辦理以清界限緣由理合恭摺具陳伏乞

皇太后

皇上聖鑒謹

奏

東海關欠解京餉片

光緒十四年十一月十二日

再准戶部咨東海關奉撥光緒十四年京餉洋稅銀三萬兩常稅銀二萬兩應卽籌解等因當經轉飭去後茲據東海關道盛宣懷稟稱該關六成洋稅應係入不敷出光緒十二年又撥解神機營洋債息款當已據實奏明請將京餉津餉各項暫免報解在案本屆自上年十一月十八日第一百十結起至本年八月二十五日第一百十二結止計收六成洋稅暨半稅銀十一萬八千八百餘兩刻下稅難暢旺再徵至年底約可收銀二三萬兩統共合銀十四五萬兩已支解各款銀十三萬七千七百餘兩尙有應解洋債息款銀一萬七千六百餘兩又補解上一期息款買鎊不敷銀四千餘兩又稅務司薪水銀一萬六千兩並應解出使經費應支本關經費核計不敷之數甚鉅實屬竭蹶萬分無從再籌解款此六

成洋稅支絀之實情也至常稅一項歷年收銀不過五萬七八千兩除免徵災區糧稅並酒船二成回空免稅暨應解各處飯銀本關經費外僅餘銀四萬兩上下以之供支海防練軍薪糧軍火尙多不足是以向在常稅內動支之輪船經費改由洋藥釐金項下動支且黃河自鄭州決口大溜南趨鐵門關水道枯涸商船不通稅課愈形蕭索而從前借墊之銀尙欠三萬一千餘兩無可歸補此又常稅支絀之實情也該道深知部庫需款但可設法敢不竭力週融無如常洋兩稅難掬俱窮他項又無可墊惟有援照歷奉恩准展緩免議成案稟請先行奏咨請將奉撥京餉展緩免議等情前來臣覆核所稟確係實情並非無故延欠理合會同山東撫臣張曜附片具陳伏乞

聖鑒敕部立案謹

卷

附省隄河工費片

光緒十四年十一月十二日

再附近省城河道隄工或工段縣長或地居險要皆關民生利害
必須認真修防前經奏定每年於清河道庫河淤地租堡船役夫
生息項下撥銀三千兩爲各工採購料物搶修之用免其造冊報
銷經工部覆准仍令工竣時開單奏報嗣因地租生息不敷動支
奏准於藩庫旗租項下湊撥在案光緒十四年開凍後卽飭照數
撥給購備樁料責成清河道劉樹堂駐工督辦伏秋各河盛漲險
工疊出均經該道督率印委分投設法搶護一律竣事據該道會
同藩臬兩司將工段丈尺動用銀數遵照定章詳報前來除民夫
土方等項仍歸民辦外所有搶修樁料用款覆核無異理合開具
簡明清單附片具陳伏乞

聖鑒敕部知照謹

奏

奏種八十三

男

謹將光緒十四年附近省城隄河各工歲搶修工段丈尺動
用銀數開具簡明清單恭呈

御覽

計開

一大清河各隄險工間段共合工長四百五十五丈搶修椿料共
用銀三百五十二兩六錢二分五釐

一千里隄並趙王河各隄險工間段共合工長二千三百九十丈
搶修椿料共用銀一千九百零九兩六錢一分

一瀦龍河隄險工間段共合工長七百五十五丈搶修椿料共用銀
四百四十一兩七錢五分

一大清河趙村坊邊埽墊陷共合工長四十丈搶修椿料共用銀
三百七十七兩三錢二分

以上各工共用銀三千零八十二兩三錢零五釐除領銀三千兩全數支用外計不敷銀八十一兩三錢零五釐已據照數籌補

淮軍報銷摺

光緒十四年十一月二十七日

奏爲光緒十三年分淮軍收支款目列爲第十六案造冊報銷繕單恭摺仰祈

聖鑒事竊照淮軍收支款項業經截至光緒十二年十二月底止列爲第十五案報銷於十四年二月初二日具奏奉

旨該部知道單併發欽此並經造冊送部接准部覆按冊核銷在案伏查十三年分淮軍分駐直隸沿海各口要區前奉天旅順口大連灣其馬步水師四十九營暨護運餉械弁勇統歸淮軍案內造冊彙總請銷今自十三年正月月起截至是年十二月底止列爲第十六案所有營哨官弁員名勇夫開收總數征防處所已造冊分咨軍機處暨戶兵工部備查又將支給正雜款項增裁數目遵照新章每三箇月開報一次咨送各部查核其馬步水師各營並

隨營辦事支應等差文武官弁親兵勇夫薪費口糧倒補馬匹柴薪車價駝騾喂養卹賞水陸轉運腳價夫工采辦製造用款油脞船隻經費正雜各項均循前案楚軍營制與奏定章程准銷例案分別截清起止概按湘平折實庫平接續造報飭據淮軍報銷局司道逐款清釐查核計舊管銀九十七萬二千二百八十八兩五錢有奇新收銀二百五十萬五千五百六十兩有奇除及附銷銀五十三萬三千一百九十九兩八錢有奇開除正雜等項遵照部議酌定軍需報銷章程各歸各部核銷計應歸戶部核銷銀一百九十八萬四千六百九十九兩九錢有奇應歸兵部核銷銀三萬二千一百二十四兩三錢有奇應歸工部核銷銀七萬五千五百一十七兩三錢有奇統共請銷銀二百九萬二千三百四十一兩六錢有奇應存銀八十五萬二千三百七兩有奇已接支十四

年正月以後淮軍馬步水師營哨正雜餉項並購製中外軍火器械工價預儲軍米等項動放無存歸於後案舊管項下滾接造報等情具詳請

奏前來臣查淮軍各營分駐直隸津沽北塘至山海關沿海一帶並奉天之旅順大連灣各海口均經修築新式礮臺擇要扼守仿照西洋兵法練習後膛鎗礮講求制勝機宜海疆千餘里逐漸布置內衛

京畿門戶外控藩屬鄰邦有事得資援應尙稱緩急可恃餉項乃計口授食之需關繫緊要歷屆報銷案內截存銀兩皆係設法節縮並將月餉酌量緩欠原以近畿海防重大軍情瞬息無定不得不稍留餘地藉備急需現計欠餉至一百五十九萬餘兩卽將截存銀兩儘數抵補不敷已巨況次年各軍食米須先期發價赴南

省購辦方不致臨時缺誤此項米價向在截存項下酌撥近因各
省關額解淮餉逐漸短少往往收不敷支竭歷情形日甚一日遂
致截存銀兩動放無存惟有隨時諄催各省關實力籌解冀免遇
事束手所有造報十三年正雜款項均係循照歷辦成案樽節支
發實用實銷並無絲毫浮冒除分造細冊咨送各部核銷並將以
後用款接續造報外理合專摺具陳並繕簡明清單恭呈

御覽伏乞

皇太后

皇上聖鑒謹

奏

軍需交涉洋務片

光緒十四年十一月二十七日

再淮軍各營洋鎗礮隊教習人等辛工礮費輪船薪糧並購辦外洋軍火價值運解礮械輪船水脚及天津行營機器製造局委員人等薪糧公費工匠工食料物購價等項多與洋人交涉均屬無例可循至操練後膛洋礮拉礮車馬喂養夫工係照奏定章程倒補馬匹例價分別核實支給業將截至光緒十二年十二月底止用款附片

奏銷在案伏查此次造報光緒十三年正月起截至是年十二月底止第十六案內前項各款遵照新章將增裁支用數目彙入季報清冊先後咨部立案茲據該司道等按款復加查核係照案接續支給並奉文飭發均無浮冒遵飭各歸各部核銷計應歸戶部核銷教習人等薪糧公費匠工拉礮馱運車馬喂養等銀十萬八

千四百七十六兩有奇應歸兵部核銷輪船薪糧夫工船價運腳
保險費倒補馬價等銀二萬七千一百九十八兩五錢有奇應歸
工部核銷油飾小修礮費購製外洋軍火器械料物價值等銀四
萬七千二百五十九兩六錢有奇共計請銷銀十八萬二千九百
三十四兩三錢有奇照案分晰彙造支銷細冊詳請附

奏前來查前項各營洋鎗礮隊教習通事工匠人等辛工購買
物料洋軍火價值運腳各款多與洋人交涉無例可循仍應查照
歷屆成案據實請銷除將細冊咨送總理衙門戶兵工部核銷外

伏乞

聖鑒謹附片具

奏

造船添鍋鑪工費片

光緒十四年十一月二十七日

再准軍水師營哨原設各礮船按照前次釘修年月扣至光緒十三年多已逾限船身朽壞應分別撥款造修又天津行營機器製造局因常年製械用鐵最多每造重大物件以尋常鐵鑪將就鎔化器具大小恐誤要工議令購置併鐵大鑪汽錘汽機各物並添建安設鍋鑪廠房工料等項業將動用各款數目遵照新章彙入季報清冊先後咨部立案茲據該司道等按款復加查核與定章及奉准飭發銀數均屬無浮計應歸戶部核銷安設鍋鑪廠房匠工銀三百五十四兩一錢有奇應歸工部核銷購置器具料物造修船工等銀二萬二百一兩有奇共計請銷銀二萬五百五十五兩二錢有奇專案分造支銷細冊詳請附

奏前來臣查前項造修船工購置鍋鑪用款或係查照定章核實

支給或與洋人交涉無例可循並無絲毫浮冒自應專案據實請
銷除將細冊分咨戶工部核銷外理合附片具陳伏乞

聖鑒謹

奏

置買帆船片

光緒十四年十一月二十七日

再泰西各國水師規制鐵甲快砲蚊礮等船外必有帆船數號爲
平時練習官弁水手之用誠以帆船須御風而行波濤顛簸較輪
船爲險凡鎗礮之命中帆纜之措手亦較輪船爲難帆船練之既
熟再上輪船膽氣自壯北洋創練海軍帆船必不可少光緒十二
年有英國商人夾板帆船一隻到津求售經飭津海關稅務司德
瑾琳驗明船身堅固並據洋員琅威理覆勘改作水師練船甚爲
合式議給價值庫平銀一萬四千五百兩由大沽船塢督同洋匠
撙節確估妥細修改工竣命名敏捷計船身一百五十二英尺寬
二十七英尺七寸艙深二十一英尺喫水十一英尺桅桿二枝半
帆纜錨練及一切應用器具俱全實用料價庫平銀七千九百三
十九兩零連購價共合庫平銀二萬二千四百三十九兩零均在

北洋防費內設法濬撥應俟彙案報銷至該船常年用款除油修一切活支之項不能預定外計配設管帶人等六十員名比照康濟威遠兩練船酌減核定計月支俸餉公費銀一千一百四十四兩又歲支醫藥費銀二百兩自光緒十四年九月初一日起亦在北洋經費內開支飭據海防支應局司道核明具詳前來臣查此項帆船改作敏捷練船人數餉數業經海軍衙門彙入北洋海軍章程

奏定有案除將管帶人等員名餉數開單分咨海軍衙門戶兵工部外所有購買英商夾板帆船改作敏捷練船緣由合再附片具陳伏乞

聖鑒敕下各衙門查照謹

奏

力疾銷假摺

光緒十四年十二月初十日

奏為

微臣

末疾漸痊依期銷假恭摺仰祈

聖鑒事竊臣於秋末感受風寒侵入頭面筋絡口高背赤十月間

請假二十日蒙

恩飭臣安心調理旋經續假一月於十一月初十日齋奉

硃批覽奏殊深廛念著再賞假一箇月務當善求醫藥妥慎調理

欽此仰見

聖慈垂注

指示周詳浹淪肌莫名感激醇親王復頒寄內造活絡丹二十

丸臣謹即依方於食前日服一丸外用清目止淚之藥內飲和胃

養筋之劑與活絡丹相輔而行一月以來背赤大消風淚亦止顯

頰閒不甚拘攣據醫者云病已減退八分惟筋力尙弱必須避風

靜養春暖始可出門其時陽氣暢達筋滯自調口尚自正現在胃
納尙少脈絡甫就蘇和用藥仍不可間斷等語臣竊自維

恩深責重顧茲時局豈臣子暇逸之時月餘雖在假中每日仍核
判案牘延接屬僚往往暑移忘食而清夜籌思每戾因病曠誤今
未疾既漸就平復亟應如期銷假上慰

宸廑惟天氣沍寒海濱節候不恆擬仍避風調攝徐冀復元以無
負安慎調理之

訓諭所有

微臣

力疾銷假緣由理合恭摺具陳伏乞

皇太后

皇上聖鑒謹

奏

海防用款立案摺

光緒十四年十二月初十日

奏爲光緒十二年北洋海防用款應行立案各項先開簡明清單
奏報隨後造冊請銷恭摺仰祈

聖鑒事竊查前准總理各國事務衙門會同戶部議撥南北洋海
防經費奏明由督辦大臣將用款數目咨報總理衙門及戶部查
核原以籌辦海防事屬創始一切用款皆無成例可循亦非他項
軍需可比是以僅令將用款數目咨報嗣經戶部議奏報銷程式
並定戶兵工三部分銷章程又令於事前奏明報部立案事後方
准核銷等因臣以立案之意必部中無案可稽者始行奏咨以備
核銷時有所稽考其曾經報部有案及常年照章支用各款自毋
庸再行立案北洋海防取法泰西諸國凡購物製器用人頭緒較
多擬屆一年將應行立案各款奏咨一次庶辦理可期簡易而稽

核亦有依據。經陳明並將光緒十年以前用款造冊請銷。十一
年分用款亦開單造冊送部。茲查光緒十二年正月起到十二月
底止經支北洋海防經費除舊有各船艇魚雷水雷各營原支薪
糧煤斤號衣旗幟水師武備兩學堂電報總分局行營製造局
水師船塢常年經費機器工程軍械子藥各項廠庫局所華洋文
武員弁人等薪餉軍械所鑄造鉛丸起卸礮械工價各臺牆礮費
馬乾郵賞暨我付九十兩年分訂購外洋軍火機器等項價值旅
順口挑築澳壩工程並雜支各款十一年以前報部有案者均毋
庸再行立案。又購以招商局利起輪船改爲北洋運船並大沽船
塢定造旅順口疏濬海澳。遇順鋼拖輪及購以英商夾板船改作
水師敏捷練船。應需工料價值及員弁人等薪糧均經專案奏咨
雇募各國洋員教習薪水川資等費亦將合同鈔錄送部。准軍報

銷局剔歸海防收銷造子辛工業經報部覆准亦無庸再行立案
此外采買製造並旅順口添設水陸軍械局及原有各師船營局
學堂添派員弁人等薪數暨一切新支用款自應循案按款摘敘
案由支數分別造冊開單先行奏咨立案飭據海防支應局司道
查明具詳前來臣查光緒十二年分非洋防費係海軍衙門按歲
支額款指撥其添購外洋軍火器械及添建臺壘庫廠等項工程
本不在內層經咨明海軍衙門有案當此創立海軍之始欽奉
懿旨逐漸擴充歷久不懈凡必須添購之器添建之工統籌全局
需費正繁以部庫同一拮据勢難動請添撥惟有權其緩急暫於
歲支額款內設法挹注竭力經營一切新支之款均係格外撙節
並無絲毫浮濫至十二年七月戶部議奏購買外洋船械鎗礮須
於未經定議之先咨報核准再與洋人定議等因所有此次添購

駁位等件均在未奉部章之先定議購辦合併聲明除俟造銷時再將各款詳細數目分晰開報並將清冊分咨戶兵工三部外理合繕具簡明清單恭摺具陳伏乞

皇太后

皇上聖鑒謹

奏

謹將光緒十二年正月起到十二月底止北洋海防經費項下應行立案新支各款開具簡明清單恭呈

御覽

薪糧及雜支項下

一大沽水雷營添設履艇一號月支油修公費銀十二兩

一北塘水雷營雷兵水勇月支考試加餉銀十五兩三錢

一山海關水雷營雷兵水勇月支考試加餉銀十七兩

一旅順水雷營添派教習一員月支薪水銀二十兩大學生三名

各月支薪贍銀七兩小學生三名各月支飯食銀三兩又雷兵水

勇副勇月支考試加餉銀二十一兩

一派道員呂耀斗接辦水師學堂月支薪夫銀一百三十兩

一水師學堂駕駛管輪各學生第四屆考試其月加贍銀二百三

十二兩五錢又添設管理魚雷機器匠一名月支辛工銀八兩鐵匠一名月支辛工銀七兩泥模匠一名月支辛工銀十二兩

一武備學堂添派提訓一員月給薪水銀五十兩漢文教習一員月給薪水銀二十兩官醫一名連配藥從人月支薪工銀三十兩洋號手二名各月給辛工銀六兩洋鼓手二名各月給辛工銀八兩親兵十名各月給工食銀四兩幼學生四十名各月給飯食銀三兩六錢幼學生使役十名各月給辛工銀三兩算學總教習一員月支薪水銀三十六兩

一派辦電報官局道員余昌宇月支薪水銀八十兩

一旅順添設水陸軍械局委員司事人等十九員名共月支薪水公費銀二百七十二兩

一派辦機器製造局知府柯欣榮月支薪水銀四十兩

一 北洋大臣衙門添設海軍房書吏月支薪俸油燭紙張銀七十兩

一 遷移蠶池口教堂案內奉

旨賞教士樊國樑英人敦約翰共銀四千兩

養船及運腳保險項下

一 水師各船添派鎗礮正教習八名各月支薪水銀二十兩副教

習十二名各月支薪水銀十五兩

一 水師候差學生馮天錫等八名共月加支銀十八兩

一 水師考留報效學生陳錫昌等八名各月支銀八兩

一 操江輪船月支公費銀二百十兩又醫士一名月支薪水銀十

八兩

一定遠等三艦教習洋員琅達博合士甘美德密祿巴格蒙等五

員名各月加薪銀二十兩

一旅順軍械庫起卸裝運礮位軍火器械共支車船夫力銀五百十四兩一錢

一千總陸麟清赴滬閩香港一帶選募三艦需用管輪管油汽銅鐵匠鍋鑪匠人等四十九名共支水腳棧租薪糧等項銀一千五百二十四兩五錢

一地亞士洋行經墊運存香港礮位等項共支還起卸駁運棧租各費銀一千五百七十兩零

一總稅務司赫德經購非洋水師需用操習水衣等項共支運保等費銀二百六十二兩零

一水師學堂購辦各學生需用儀器書籍畫具圖紙等項共支運保等費銀二百十四兩零

一招商局輪船承裝八生的密達後膛鋼礮三十尊並車架器具
子彈零件由滬運津共支水腳保險等費銀一千七百六十六兩
零又拖帶旅順口導海挖泥船赴大沽船塢修理共支拖費銀三
百四十兩又承裝十五生脫十二生脫礮位十二尊並礮架千斤
柱礮彈拉火零件由滬運至旅順口共支水腳銀二千九百四十
五兩零又承裝二十四生脫後膛大礮四尊並鐵件架具礮彈拉
火及雷艇銅管等項由滬運至旅順口共支水腳銀二千九百九
十一兩零又承裝礮位礮彈引礮架車輪等項由滬運津共支
水腳銀一千一百二十三兩零又承裝車油螺絲床鐵路鐵器等
項由上海煙臺天津等處運赴旅順口共支水腳銀一千一百四
十四兩零又承裝八生脫車礮四十八尊並隨礮車架器具零件
子彈等項由滬運津共支水腳保險等費銀一千二百八十三兩

零又承裝電燈塞門德土等件由天津運赴山海關共支水腳銀二百兩零

一招商局輪船調津聽候巡閱海口差用共支薪費銀九千四百八十兩

一利運兵駁船由旅順裝送護軍營勇丁二百名赴仁川津貼往返飯食共支庫平銀一百二十兩

一截留招商局輪船差遣朝鮮等處共支用費銀二千九百八十兩零

采買及製造項下

一威遠練船購配料件共支價銀一百九兩零

一總稅務司赫德經購北洋水師需用操習水衣等項價銀三千

二百九十二兩零

一洋員葛果德經購水師機器廠需用料件價銀八百十兩零

一購買海船需用鐵練輪軸共支價銀九百五十六兩零

一水師學堂教習洋員霍克爾經購各學生需用儀器書籍器具

圖紙等項價銀二千九兩零

一旅魁魚雷營購備雷艇小抵力汽缸一具價銀二百四十七兩

零

一新造武備學堂添置傢具并水龍等項價銀三千四百二十五

兩零

一水師練船學生需用洋紙筆及水師機器廠料物等件價銀三

百六十九兩零

一旅順工程局購二十五馬力吸水機器鍋爐一座并零件價銀

一千八百兩

一購竹海各礮臺需用測遠器五副先支價銀八百四十九兩零
一添購克鹿卜九生脫後膛陸路鋼礮備換礮門四副價銀三百
四十七兩零

一購克鹿卜廠七生脫半新式過山重礮並藥彈等件共先支定
價銀三萬三千三十九兩零

一購洋皮紙價銀一千十六兩六錢

一購青鉛價銀七千六百七十九兩零

一製給頒賞洋員金銀寶星等件工料銀四百八十五兩零

一軍械所協撥黑龍江兵鎗添置木箱工料銀三十七兩零

一津海關稅務司代購裝煤蘇袋價銀九十七兩零

一大沽船塢彙報光緒十一年分修理大沽旅順各營礮械汽機

等項并起卸礮件料價銀四百三十三兩零又十二年存季修理

六鎮礮船并添置備用各件料價銀三千六百三十六兩零又修理康濟超勇揚威操江快馬海馬鐵龍并廣艇挖河等船暨添置備用各件料價銀八千一百四十二兩零又十二年秋季修理六鎮礮船并添置備用各件料價銀二千二百兩零又修理康濟練船并添置備用各件及大舢板料價銀四千七百四十一兩零又修理海馬小輪船并添置備用各件料價銀二百十八兩又修理導海機器船并添置備用各件料價銀七千三百二十九兩零又修理大沽水雷營一號廣艇并造舢板及添備用各件料價銀二千一百四十七兩零又承修威遠練船大舢板並威遠船備用各件料價銀一千九百四十七兩零又承造海鏡輪船需用十四槳大舢板並海鏡船添置備用各件料價銀一千三百十三兩零又建造收度蚊礮船土鳴兩道先領工料銀二千八百九十四兩零

一超勇揚威威遠三船赴上海祥生懋洋廠油修船底并添備應用各件工料銀四千八百八十五兩零

一旅順工程局修理利順小輪船工料銀一千二百五十七兩零又修理艇船二隻工料銀一千六百十兩零

一行營製造局修理大沽水雷營守雷下雷小輪船二號工料銀二千三百十五兩零

一津海關道建造博文書院工料銀一萬四千四百七十四兩零一管輪學堂內添建化鐵打鐵兩廠工料銀四百十五兩零

一旅順口元寶房鹿尾山教場溝饒頭山等處建造水陸軍火庫并廠棚住房等共一百四間圍牆三道濠溝一道工料銀三萬二

千六百二十一兩零
一修造旅順黃金山礮臺馬路圍牆及子彈巡更等房工料銀二

下二百七十七兩零

一旅順口改建護軍營教習洋員住房一所工料銀二千一百九十六兩零又建造礮臺監工人等辦公住房一所共支工料銀二千三百二十八兩零

一旅順白玉山改建水陸軍械總局并添建礮位子彈引信等庫計六十四間工料銀九千五百七兩零

一旅順魚雷營添建魚雷庫九間機器廠四間石牆一道工料銀二千七百四十五兩零

一旅順礮臺人字牆內添建辦公及存儲軍裝等房十八間工料銀一千三百八十二兩零

一旅順嶗嶗礮臺換設二十四生脫大礮二尊工料銀七百三十五兩零

一軍械所代製旅順口導海挖泥船工匠雨衣雨帽工料價銀三十五兩零

一武備學堂製給學生各項號衣褲號帽戰靴等項工料銀九百六十一兩零

一大沽南灘行營添設礮位二尊共月支礮費銀十六兩

一義勝營添設北塘螳頭沽臺牆礮位四尊共月支礮費銀十八

兩

一山海關衛海城等處添設礮位十六尊共月支礮費銀八十四兩零

一旅順口東岸人字牆牧豬礁兩處礮臺添設礮位十二尊共月支礮費銀五十六兩零

一旅順口東岸田雞礮臺添設礮位六尊共月支礮費銀四十八

兩

一旅順口東岸嶗嶗嘴礮臺添設礮位六尊其月支礮費銀六十兩

一旅順口西岸蠻子營饅頭山城頭山各礮臺添設礮位八尊其月支礮費銀五十六兩

查以上各款均係十二年分新增支項應遵照部章先行奏咨立案其一切例支款項及業經奏咨毋庸再行立案者均未開列理合聲明

三鐵艦支用銀數片

光緒十四年十二月初十日

再北洋定遠鎮遠濟遠三鐵艦官弁人等奏定薪糧公費醫藥費並煤油修費等項自光緒十二年正月月起隨時派員赴海軍衙門請領分別轉給在案查光緒十二年薪糧公費醫藥費係按湘平發給所扣平餘銀兩作正列收十三年改照新章按京平請領其煤油修費等項雜支用款或係規平或係湘平行平並無一定與額支薪糧不同且多與洋人交涉均按原平折合庫平支發概不扣平業經海軍衙門核准並令將用款自行奏明報部核銷等因茲查定鎮濟三艦十二年領到薪糧公費等項庫平銀十七萬九千七百三十二兩支用庫平銀十八萬一千八百六十三兩零計不敷庫平銀二千一百三十一兩零在於本案提扣湘平平餘項下支給其提扣平餘一項每庫平一百兩扣湘平平餘銀三兩六

錢三分按支款庫平銀十八萬一千八百六十三兩零應扣湘平
平餘銀六千六百一兩零折合庫平銀六千三百七十兩零內提
撥薪糧不敷庫平銀二千一百三十一兩零尙存平餘庫平銀四
千二百三十九兩零合京平銀四千五百九兩零歸於十三年分
列收又領到煤油修費等項庫平銀十五萬兩支用庫平銀七萬
三千三百八十兩零尙存庫平銀七萬六千六百十九兩零亦歸
十三年分列收至十三年領到薪糧公費等項京平銀十九萬五
千四百七十兩零連十二年餘存平餘共合京平銀十九萬九千
九百八十兩零支用京平銀十九萬九千九百八十兩零收支相
抵又領到煤油修費等項庫平銀五萬兩連十二年餘存款項其
合庫平銀十二萬六千六百十九兩零支用庫平銀八萬九千六
百八十八兩零尙存庫平銀三萬六千九百三十一兩零歸於十

四年分列收再行滾接造報計二十三兩年共支薪糧公費等銀三十八萬一千八百四十三兩零應統歸兵部核銷共支煤修等項銀十六萬三千六十八兩零內應歸工部核銷銀十五萬四千七百八十二兩零應歸兵部核銷銀八千二百八十六兩零均係撙節動支實用實銷並無絲毫浮口飭據海防支應局司道造冊具詳前來臣復核無異除用款已隨時咨報海軍衙門並將清冊分送戶部查照暨咨兵工部核銷外所有定鎮濟三艦光緒二十三年兩年支用薪糧公費醫藥費並油修等項銀數理合附片陳明伏乞

聖鑒敕部核銷謹

奏

洋教習請獎片

光緒十四年十二月初十日

再北洋海防前募英德各國兵官施密士額德茂鮑德均伊爾文貝阿等五員來華派充水雷鎗礮等教習均能盡心謀導勞瘁不辭嗣於期滿後分別遣撤據各該營局稟請奏獎前來臣查洋員在華當差出力疊蒙

賞給寶星有案該洋員施密士等當差年久事同一律既經著有成效期滿遣撤自應給予獎敘俾資鼓舞所有德國水雷教習施密士陸路礮隊教習額德茂英國一等醫官鮑德均伊爾文按照定章擬均請

賞給三等第三寶星德國隊長貝阿擬請

賞給四等寶星俟奉

旨後由臣飭局照式製給並知照總理衙門發給執照以昭信守

理合附片具陳伏乞

聖鑒訓示謹

奏

調劑河災引岸捐

光緒十四年十二月十三日

奏爲上年鄭州河決蘆屬豫岸引地受傷甚深請分別酌予調劑以恤商艱而保災岸恭摺仰祈

聖鑒事竊據長蘆鹽運使賀良楨詳稱去秋鄭州黃河決口大溜南趨蘆屬豫岸引地如尉氏扶溝中牟鄭州西華淮甯祥符太康項城沈邱鄆陵通許商水杞縣等十四處皆被災傷甚至村莊漂沒百姓逃徙食鹽無人且鹽包多被衝淹成本大虧商情危迫疊據呈懇拯救該司當飭地方官查覆嗣又據尉氏扶溝商人中和成全德稟稱商等認辦之尉氏試辦之扶溝皆首當黃水正溜受災尤重本年伏秋大汛水勢日益增長居民流亡愈多月銷僅及額引二成實不敷迎腳辛工之用扶溝額引太重參懸已久幾成廢岸商人全德原係試辦平日銷數不及額引之半尉氏亦因額

重銷滯參懸經商人中和成接認賠累難支不意又遭黃河之變
嗣後大工合龍而已徧地沙壓歸耕無人引岸必致廢弛請停減
額引緩徵課款經該司委員蕭贊元董元森馳往會同各該州縣
逐細勘明繪圖開列稟覆除杞縣鄆陵商水西華四處情形較輕
均已駁飭無庸置議外其尉氏扶溝兩處正當大溜之衝水勢浩
瀚鋪漫全境鹽包既被衝沒現在居民四散月銷僅及額引之二
被災實爲尤重中牟淮甯項城三縣皆爲大溜所經鹽包亦多漂
失村莊半被淹浸逃亡不少食鹽無幾被災亦重鄭州祥符沈邱
通許太康五處亦因漫淹日久鹽包損失小民蕩析離居運艱銷
滯被災次重據請緩徵正課與道光年間黃河決口恤商成案相
符惟尉氏扶溝木係疲岸今因災成廢非僅緩課所能補救查尉
氏縣原設額引二千九百五十六道向係停積過半同治年間商

人晉和順賠累潛逃經前司設法招徠至光緒元年始令商人中
和成承認無如地瘠民貧戶口止有此數每年僅銷鹽一千二
百包扶溝縣原設額引五千三百五十八道其數更重自道光二
十七年認商豫興參懸後至三十年始有民販李永和等濟銷咸
豐五年改歸官辦旋即停止十年復招商接濟民食歷時未久亦
卽歇業同治十二年商人振德捐鹽二千包歷四閱月僅銷二百
餘包嗣經官運督銷始令商人全德勉力包額試辦三年乃每年
銷鹽祇一千八百包是尉氏扶溝兩處月銷均不及額引之半
平時包賠空課已鉅迨去秋鄭工決口該兩處被水獨廣受災最
深衝沒鹽包無算成木大虧情形實已岌岌現在居民逃徙十室
九空幾至停秤加以道途水阻挽運不易車船腳價昂貴異常且
黃水經過地面積成板沙卽合龍後良田難復人民莫可歸耕銷

鹽無路如朱仙鎮一帶從前繁庶甲於中州今則變成沙漠地皆不毛人煙稀少其明證也向例水冲沙壓之地錢糧應卽豁免引地既乏食鹽之人亦應停減額引方昭平允長慮引重之區曾於次停減有案今尉氏扶溝月銷僅及額引之二必須量爲停減以解倒懸否則一經參遺無人接辦課款終歸無著該司於直隸懸岸節經竭力整頓凡銷路稍暢之東明鄆城郟陵杞縣等處本年秋崗已飭包額認運計增復懸引一萬二千九百餘道於課帑不無裨補其受災太重銷數奇滯者亦不得不酌予調劑擬請將尉氏扶溝額引自光緒十五年起照額領運五成行鹽納課不准積壓其餘五成暫停數年俟將來察看情形再復原額如此變通辦理災岸可期保全而減引無多亦尙無礙大局至該兩縣商人並災重之中牟淮甯項城三縣商人光緒十五年應完十三年正課

只銀一萬二千七十三兩一分九釐均請於奏銷時先徵六成其餘四成緩至十六年菜秋後分作五年帶徵被災次重之鄭州祥符沈邱通許太康五州縣商人光緒十五年應完十三年正課銀一萬三千五百八兩七錢四分八釐均請於奏銷時先徵七成其餘三成緩至十六年菜秋後分作三年帶徵統計緩徵銀數有限於應解京協各餉不致貽誤具詳請

奏前來臣查核所詳皆係實在情形非此不足以恤商艱而保災

岸仰懇

天恩俯准如議分別辦理此因大河決口受傷特重酌予調劑並非常有之事他處不得援以為例理合恭摺具陳伏乞

皇太后

皇上聖鑒訓示謹

奏

奏稿六十三

中

旅順興辦船塢片

光緒十四年十二月十九日

再旅順口爲北洋海防緊要門戶水師各船皆須就此口內停泊
歸宿應做鵬澳等工必不可緩前經奏明飭派道員袁保齡督同
洋員漢納根等挑挖澳身疏濬海口船路蓋造庫房各項惟應築
石船塢備修鐵甲快船尤關水師根本工程極爲艱鉅需費繁多
必須幾經歷練結實可靠之人方能承辦中國無此良匠各國洋
匠欲攬工作者甚多非開價過昂卽不肯保固嗣經水陸營務處
臬司周馥等多方物色適有善辦船塢之洋師法人德威尼經其
本國製造公會選派來津與之討論多次所開做法條理周詳價
值亦較核實且有法國銀行作保計大石塢一座凡修理鐵甲各
船一應機器俱全連做工各廠儲料各庫辦公住人各屋並週澳
三里餘之靠船大石泊岸以及鐵道起重碼頭電燈自來水等工

一切在內訂明承攬包辦實需銀一百二十五萬兩自攬定之日起按西歷三十箇月完工驗收後一年內仍由德威尼與該銀行照料修理此後再保固十年儻有損壞由於工程不精者皆責成該銀行賠償經臣督飭該司道詳加考核始行定議並飭周馥與道員劉含芳督同公辦此項工款除由北洋經費內籌撥銀七萬八千八十兩外尙需銀一百十七萬一千九百二十兩前由臣商海軍衙門轉咨戶部核准在於直隸所收展捐項下劃收銀六十三萬一千四百三十二兩八錢九分又由部庫撥給銀五十三萬九千四百九十七兩一錢一分業經按照德威尼所做工程陸續發給具領茲查船塢工程已漸就完竣惟船塢口門太寬風浪太大上年德威尼攬辦塢工時曾言須於東西北三面加砌石壩方與塢工有益因測量澳口稀淤太深不易措手是以原估未經

核入旋據水師各將領會稱此壩關係緊要於修船設防均有裨益亟宜設法添造復飭周復劉舍芳與德威尼詳加勘驗再四商議在東北兩面做石壩一百丈西面就所砌石隄修理平整穩固並做寬大經久之鐵碼頭一座碼頭上石塔鐵路鐵梯船樁電燈淡水管等件如法布置樽節估計實需銀十四萬三千五百兩保固一切概照陽工辦理完工之期照原限再展六箇月計連陽工原估共需銀一百三十一萬五千四百二十兩除割收展捐之項及由部撥給外計尙不敷銀十四萬四千四百九十兩本應循案請撥惟念部庫非裕不得不設法月籌查北洋購置四快船一款現尙有截存銀六萬餘兩應卽儘數撥用其餘不敷銀八萬餘兩卽在北洋防費項下設法陸續挪湊應急俾免部撥爲難除俟陽工壩工一律完竣驗收後再行核實奏報外理合附片具陳伏乞

奏
聖
敕
部
知
照
謹

慶
和
六
十
三

三

機器局報銷摺

光緒十四年十二月十九日

奏爲天津機器局光緒十二年分動用經費照章造冊報銷恭摺

仰祈

聖鑒事竊照天津機器局經費奏明勅撥津海東海兩關四成稅暨由戶部月撥邊防餉銀一萬兩截至光緒十一年分止業將收支款目造冊奏報經部核覆在銷并將十二年分支給薪工等款分別咨部立案茲據該局司道沈保靖等將十二年應行造銷之冊分晰開報計上屆存銀十萬三千三百八十一兩零本屆十二箇月其收稅項部餉及各省撥還銀三十二萬三千三百三十二兩零共支銷銀二十九萬六千二百十二兩零應存銀十二萬七千五百一兩零業經定購外洋器料並添建廠屋工程動用應歸付清價腳及工竣之年報銷所有本屆應銷各款仍照向章各歸各冊

計全案收支總數及員弁司事工匠夫役人等薪工爲第一冊
辦物料續建工程及核付保險運腳等項爲第二冊
收支物料分
項造報用存物料作爲十三年分舊管爲第三冊
製成軍火撥發
各項爲第四冊
外撥各船薪糧物料及行營製造局大沽水雷營
用料爲第五冊
神機營撥用器料爲第六冊
其製成軍火仍造冊
咨送總理各國事務衙門備查
至製造各項器物皆仿西洋新式
難以例價相細循照
歷屆章程實用實銷詳請具奏前來
臣查該
局所呈各冊
覆加確核委係核實動用毫無浮冒
北洋籌辦海防
拱衛

綏輔欽奉

懿旨
逐漸擴充
歷久不懈
現當創立海軍之始
凡鐵艦快船魚雷艇
水雷營及各口礮臺
陸軍應需軍火均關緊要
該局爲北洋水

陸各軍取給之源外省又時來請撥必須設法籌備惟應領部款
前已停止僅指津東兩關四成洋稅及海軍衙門撥給洋藥釐尚
多短缺又須添造新式長礮鋼彈新式栗色火藥雖月撥經費銀
八萬兩而各省關能否如數撥解尚未可必惟有督飭局員就款
撙節動用勉力支持冀免貽誤除將清冊分送總理衙門暨戶兵
工三部查照外所有天津機器局光緒十二年動用經費造冊報
銷緣由理合恭摺具

奏伏乞

皇太后

皇上聖鑒謹

奏

李文忠公奏稿卷六十三